

## **EH Bildu talde politikoa**

Grupo político EH Bildu

Ijentea, 1 - 20003 Donostia

Tel. 943481027 eh\_bildu@donostia.eus-- [www.donostia.ehbildu.eus](http://www.donostia.ehbildu.eus) -

## **KONTROL MOZIOA**

### **kirol arloko sexu abusuen eta jazarpenen kontrako protokolo eta kanpainei buruzkoa**

Reyes Carrere Zabala EH Bilduko zinegotziak, Udalbatzaren Organo Araudiko 98. artikulua oinarri hartuta, mozio hau aurkezten du Udalbatzan azter dadin, Mozioa 2021eko ekainaren 14an Pertsonentzako Zerbitzuen Batzordean aztertutako interpelazioaren ondorioa da.

## **JUSTIFIKAZIOA**

Apirileko osoko bilkuran, Berdintasuneko zinegotziak adierazi zuen kirol arloan emakumeen kontra egindako sexu eta genero indarkeriaren aurkako kanpaina bat aktibatzeke asmoa zuela, jai inguruneetarako egin ohi den kanpainaren alternatiba gisa. Erabaki hori berriro adierazi zuen arduradunak Donostiako Berdintasun Kontseiluan, 2021eko maiatzaren 11n.

Horrelako kanpaina bat aktibatzeke, gure ustez berrikusi edo, behintzat, aztertu behar diren zenbait gai adierazi genituen foro horretan bertan. Funtsean, ez du zentzu handirik ekintza hilabete gutxi batzuetara mugatzeak; izan ere, kirola urte osoko jarduera baita. Halaber, kiroleko sexu indarkeriaren eta abusuen aurkako kanpainak irismen eta eraginkortasun handiagoa izan dezan, urte osoan hedatu beharko litzateke.

Bestalde, oso garrantzitsua da kirola-eskola jardueran sexu-abusua espezifikoki lantzea. Kirolari segmentu hori, guztiak adin txikikoak direnez, oso ukibera da abusatzaileekiko, eta, askotan, abusua estalita geratzen da ustezko kirol errendimenduari, jarduera fisikoarekin eta osasunarekin lotutako jarrera faltsuen ondorioz.

Kirolean sexu indarkeria desagerrarazteko, urrats sendoagoak eta ausartagoak egin behar ditu Udal Gobernuak arlo horretan, milaka baitira Donostian modu batean edo bestean jarduera fisikoa egiten duten neskak eta emakumeak.

Emakume kirolarien aurkako sexu jazarpena eta abusu psikologiko eta fisikoak bere osotasunean landu beharreko gaia da. Jakina da oso errealitate konplexua dela eta adar asko dituela: diskriminazioa eta hizkera sexista komunikabideetan, zenbait entrenatzaile/masajista/zuzendarik abusuak eta jazarpenezko jarrerak izatea kirolari/epaile/entrenatzaileekin, lan aukera falta, aurre-iriztiak eta abar.

Horretarako, kirolariei eta haien ingurukoei zuzendutako prebentzio kanpainak egiteaz gain, behar-beharrezkoa da gobernu honek gure hiriko kirol erakunde guztiei berdintasun plan bat prestatzeko laguntza eta orientazioa ematea, eta aldi berean, hori aplikatzen laguntzea. Berdintasun plan horrek sexu jazarpenaren eta abusuaren aurkako protokolo bat ere behar du, kirol jarduera eremu guztietan (entrenamenduan eta lehiaketan) aplikatu beharrekoa, eta, modu eraginkorrean ezartzeko, klubaren eta gure hiriaren errealitate sozioekonomikora egokitua.

Batzordean, Berdintasuneko zinegotzi delegatuak argitu zuen pentsatua daukaten kanpaina abendura arte luzatuko dela; oso orokorra izango dela, herritar guztiei zuzendua; eta aurreikusitako bost eszenatikoetatik bat zuzenduko dutela jarduera fisikoa egiten duten emakumeentzat, baina hala ere, ez direla kirol-klubak kontuan hartu.

### **EH Bildu talde politikoa**

Grupo político EH Bildu

Ijentea, 1 - 20003 Donostia

Tel. 943481027 eh\_bildu@donostia.eus-- [www.donostia.ehbildu.eus](http://www.donostia.ehbildu.eus) -

Bestalde, sexu-jazarpenaren protokoloa duten hiriko kirol-kluben kopuruari dagokionez, ez zuela eskura informazio hori, eta, nolana ere, Berdintasun Sailak Donostia Kirolarekin lan egiteko prestutasun osoa duela.

Azkenik, ez zuen aipamenik egin hurrek eskolako eskola-kirola mailan jasandako abusu eta jazarpenei buruz.

Horiek horrela, honako hau da behean sinatzen duen zinegotziak aurkeztutako **KONTROL MOZIOA**:

1. Donostiako Udalbatzak hertsiki eskatzen dio Udal Gobernuari azterlan bat egin dezala emakume kirolariak Donostian kirol-arloan jasaten duten sexu jazarpenaren eta abusuaren norainokoari buruz; balio dezala errealitate hori ikusarazteko eta hiriko kirol-jardueran duen eragina ikusarazteko; eta, aldi berean, azterlan hori abiapuntu izan dadila eremu horretan indarkeria prebenitzeko eta erreparatzeko politikak eta neurriak ezartzeko eta programa espezifikoak garatzeko.
2. Donostiako Udalbatzak hertsiki eskatzen dio Udal Gobernuari lantalde bat abian jar dezala Berdintasun Sailarekin, Donostia Kirolarekin eta Donostiako kirol-erakunde eta kirol klubetako ordezkariekin batera, kirol-arloko sexu indarkeria eta jazarpena prebenitzeko protokolo-eredu bat egiteko, eta eskura dituen udal-baliabideak jar ditzala klubei hura ezartzen laguntzeko.
3. Donostiako Udalbatzak hertsiki eskatzen dio Udal Gobernuari Berdintasun Sailak, Donostia Kirolak eta Hezkuntzak osatutako lantalde bat abian jar dezala, haur adingabeei kirol zerbitzua ematen dieten kirol eskoletako eta akademietako ordezkariekin batera, guztien artean adostu dezaten eskola-kirolean sexu indarkeria eta jazarpena prebenitzeko protokolo-eredu bat, eta eskura dituen udal-baliabideak jar ditzala hura ezartzen laguntzeko.
4. Donostiako Udalbatzak Udal Gobernuari hertsiki eskatzen dio kirolean sexu jazarpena eta abusua prebenitzeko kanpaina espezifiko eta iraunkor bat martxan jar dezala, eta, horrela, emakumeek eta, oro har, herritarrek identifikatu dezatela gure ingurune hurbilean hain gutxi aztertu den indarkeria-mota hori.

Donostia, 2021eko ekainaren 18a

Reyes Carrere Zabala  
EH Bildu udal taldea